

**Date – 28/10/2024**

**Time - 18:30 -18:40Hrs**

## **REGIONAL NEWS BULLETIN**

### **HEADLINES (EVENING)**

- 1. Ramchhung hmun dang rualin vawiin khan Mizoramah Vigilance Awareness Week hman tan a ni.**
- 2. Chief Minister Pu Lalduhoma chuan Mizoram dinhmun dik tak hriat a pawimawh avangin sorkar deparment-te chu Data dik tak vawng turin a chah.**
- 3. Prime Minister Narendra Modia leh Spanish PM Pedro Sanchez te chuan vawiin khan Vadodara-a TATA Aircraft Complex an hawng.**
- 4. Jharkhand Assembly inthlan thawh khatna nomination thehluhte vawiin khan endik a ni.**

**<><><>**

### **VIGILANCE WEEK**

**Ramchhung hmun dang rualin vawiin khan Mizoramah Vigilance Awareness Week hman tan a ni a.**

**Mizoram Secretariat tualzawl MINECO-ah chuan Chief Secretary Dr Renu Sharma hovin Secretariat a Officer leh thawktu zawng zawngte'n an hna tha tak leh langtlang taka thawk tur te, eirukna leh hlemhletna laka fihlim tur te-in thu an tiam a ni.**

**Sardar Vallabhai Patel-a piancham October ni 31 pualin he hapta hi ram pumah hman thin a ni a. Kuminah chuan vawiin atanga November ni 3 chhungin Vigilance Awareness hapta hi hman a ni ang a, Akashvani Aizawl Stationah pawh thutiam rualna hun hi hman a ni.**

**(Vigilance Awareness hapta pual hian vawiin khan Akashvani, Aizawl chuan Tuikhuahtlanga an Office khawtah hun an hmang a, hun hmanaah hian Director Pu DR Lalropuia kaihhruaina in Staff zawng zawng ten rinawmna thutiam an la a ni. Kumin thupui chu "Integrity for Nation's Prosperity" tih a ni.**

**<><><>**

### **CM MPLAN**

**Chief Minister Pu Lalduhoma chuan Mizoram dinhmun dik tak hriat a pawimawh avangin sorkar deparment-te chu Data dik tak vawng turin a chah.**

**Vawiin khan Planning & Programme Implementation Department Conference Hall-ah Chief Minister Pu Lalduhoma chuan Sustainable Development Goals Dashboard thar leh Project Monitoring Committee**

Dashboard thar (MPLAN) a hawng a. Data lakkhawm hna kalpui zui nghal a ni ang.

Chief Minister chuan, Dashboard pahnih te chu Data dik tak thunluh hmanga kalpui tur a ni a ti a. Data dik lo an thun chuan an dinhmun dik tawk lo a pho chhuahtir dawn a. Chuvangin Department tinte chu an data dik tak chauh thun turin a chah a ni. Data dik a nih phawt chuan tlakhniam deuh pawh hreh lo turin a ti a. An dinhmun dik tak an hriat kha a pawimawh hmasa a ni, a ti.

Pu Lalduhoma chuan, ruahmanna te chu khuarei daih hmasawna thlentu an nih a ngai a ti a. Project thenkhat chu tha tak angin lang mah se kawng danga tichhetu a lo ni ve reng thei tih sawiin, project khuarei daih leh tha zel thlan thiam a ngai, a ti a. Project kal fuh tawk lo, hna hlamzuih te, a huna zo thei lo te a awm loh nana vil rengtu tur project monitoring committee an nei tawh a, member pawh mipui huapzo tak a ni a ti bawk. CM chuan project te chu kal tluang se, a hun taka zawh theih ni se, Mzoramin chak takin hmasawna hmu se a duh tih a sawi.

SDGs dashboard hi Ministry of Personnel Public Grievances and Pension leh Planning and Programme Implementation Department te sum thawh dun hmanga siam a ni a. A siam turin UNDP te chu thawhpui an ni. Sustainable development goals lama state level atanga village level thleng vilna tur a ni. Mizorama khua zawng zawngte SDGs dinhmun a en theih ang a, Block level dinhmun te, district level dinhmun chenin a en theih ang. SDGs Local Indicator Frameworks hi state sawrkarin a duh dan anga a duan tur a ni.

MPLAN Dashboard hi Integrity Tech Solutions Private Limited te nena siam a ni thung a. A siamna tur sum hi NITI Aayog State Support Missions atanga hmuh cheng nuaih 69 leh sing 9 a ni. He dashboard hi project proposal te, DPR te thehluhna tur a nih bakah cost benefit analysis te, project feasibility te lo zirchian (analysis) thlengin a thawk thei a. Project ziaktute tan state level data pawimawh hriatna a pui thei bawk ang.

<><><>

## WATER SUPPLY

Public Health Engineering (PHE) minister Prof. Lalnilawma chuan ruahman anga an kaltluang thei a nih chuan Aizawl khawpuiah November thlaah chuan tui sem dan pangngaia sem leh theih tawh an beisei tih a sawi a.

Cyclone Remal avanga Tlawng lui lian nasa in Aizawl khawpui tui lakna Greater Aizawl Water Supply Scheme (GAWSS) Phase I & II a chhiat avangin tui Pump theih zat a tlahniam, hei hian mipuia tuisem a nghawng zui zel a, PHE Minsiter chuan, PHE Department thawktu ten chhun zan zawmin a siam hna an thawk reng tih a sawi a, November thlaah chuan tui sem dan pangngaia sem theih tawh an beisei avangin mipuite chu dawhthei taka lo nghak turin a ngen.

Kan Corr chuan vawiin khan Aizawl veng thenkhata tuisem dan zawt kualin, mi thenkhat chuan PHE tui sem an kham khawp loh avangin mimal zawrh an lei thin tih an sawi a, hetihlai hian fur ruahtui a tlak tam avangin ruahtui khawl thei ten harsatna an tawk lo a, ruahtui dawhna siamthar pawh an thehnem hle bawk a ni.

Kan corr report lo ngaithla ang.

VC

(Aizawl khawpui chhungah ruah tui dawhna nei lo, sorkar tui sem ringawt ring an awm a, heng chhungkua te hian harsatna an tawk nasa zual a, kham khawp an hmuh loh avangin mahni sum senga Tui lei an awm reng a, hei vang hian ruah tui tlak tam lai pawhin kum tluana tui zuar an awm bawk a ni.

Aizawl khawpui chhungah hian mimal, Pik-Up hmanga tui zuar an tam a, Tui zuartu pakhat kan kawm chuan, tun dinhmunah Tui Liter 2000 chu cheng 1000 in an hralh thin tih a sawi a, fur ruah tui a tlak rei avangin kum dang angin hralhna a an hmuh tam lutuk lo deuh niin a sawi.

BYTE

Hetih lai hian PHE department chuan ni tin tui litre nuai 390 an pump thei tawh tih an sawi a, hei hian Aizawl khawpui mamawh zualpui chu a phuhru thei an ti a ni.

<><><>

## HOME MINISTER

Home Minister Pu K Sapdangan VIP Culture tibo turin ZPM sorkar chuan hma la in tunah chuan airport ah pawh mipuite nen ang khatin an zin veivak ta a ni, a ti.

Vawiin khan ZPM General Headquarters Party Office ah hun hmangin Home Minister chuan, Sorkarna an chelh tirh atang khan ram kawtchhuah check gate-a duty kutkem neite nuaibo hna theih tawpin an thawk nghala, checkgate zawng zawngah sorkar phalna lo chuan sum lak leh khawn an phal tawh lo a ti a, Foreign kuhva tawlh ti bo turin theih tawp an chhuah mek a, sorkar hmasa hun laia zung a lo inkaih thuk tawh a vangin an tum ang ngawta chawp leh chilha tihreh erawh a har a, mahse tha an thlah dawn lo a ti.

Kuhva tawlh hian state chhunga kuhva chingtute eizawna a tih chhiat bakah black money a ti punga, zirlaite hmakhua a tihchhiat bakah inhmun lo ram a ti to em em a ni a ti a, Chuvang chuan danlo a kuhva tawlh dona kawngah Sorkar chuan tha a thlah dawn lo a ni, a ti.

Pu K Sapdanga chuan, aikal tibo tura hma an lakna kawngah huaisen taka kalin, ring an tikhawnglui a tunah chuan sorkar hnathawk aikal lak an tibo thei ta a ni, a ti a. Office hun bi dik taka vawng turin hma an la tih sawiin, tunah chuan Sorkar hnathawkte pawhin Office ah hnathawh hun tam zawk an nei thei ta a ni, a ti.

Home Minister chuan, Sorkar kaltawh ten tithei bik tura insawia politics khelh nana an hman thin chu Assam Rifles insawn chhuah chung chang a ni a ti a, theih tawp chhuaha Chief Minister hmalakna chuan rah tha chhuahin, Assam Rifles insawnchhuahna tur thuthlung an ziak fel thei ta a ni a ti a, hetih lai hian an sorkar laia sawn chhuak chak em em eptu party lam chuan sawn chhuah an hlau leh lawi si a ni a ti.

<><><>

## AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te ngaihthlak leh chhiar theih a dah a ni.

<><><>

## PM MODI AND SPANISH PM

Prime Minister Narendra Modia leh Spanish PM Pedro Sanchez te chuan vawiin khan Vadodara-a C-295 sipai thlawhna siamchhuahna tur TATA Aircraft Complex an hawng. Vawiina Aircraft Complex hi ramchhunga mimal enkawl sipai thlawhna remkhawmna tur hmasa ber a ni. Thusawiin Prime Minister Modia chuan Tata Aircraft Complex chuan aerospace lamah India chu khawvel hmuhah a vawrsang viau dawn a ti a. India leh Spain inkara thawhdunna pawh tihchakin ramchhunga thil siamchhuah tihchangtlun kawngah pawh a thawhhlawk hle ang a ti.

Puan tawh angina Spain Prime Minister Pedro Sanchez chuan nizan khan ni thum cham turin India alo thleng. Pu Sanchez-a hi a nupui Begona Gomez chuan a rawn tawiam a. External Affairs Ministry thuchhuah danin tun tum hi Prime Minister Sanchez-a lo zin vawi khatna tur a ni a. Kum 18 hnua Spain Prime Minister lo zin leh hmasak ber a ni.

Vawiin vek khan Prime Minister Modia hian Amreli atangin hmasawmna project hrang hrang a hawng a. Heng project zingah hian railway, tui semchhuahna leh tourism lamte a tel a ni. Kan correspondent report i lo ngaithla ang u.

<><><>

## ELECTION

Jharkhand Assembly inthlan thawh khatna nomination thehluhte vawiin khan endik a ni a. Assembly bial 43 ah November ni 13 khian vote thlak a ni ang. Candidate te tan naktip thleng inhnudawh theih a ni a. Vote hi November ni 23 ah chhiar a ni ang.

Hetihlai Assam-a Assembly bial panga by-election atana nomination thehluhte pawh vawiin khan endik a ni a. Inthlanna tur bialte hi Dholai, Samaguri, Behali, Sidli leh Bongaigaon bialte niin November ni 13 ah vote thlak a ni ang.

<><><>

## CAF&PD

Union Consumer Affairs, Food and Public Distribution Minister Pralhad Joshi chuan Rice Miller ten an thar chhuah ang angte sawrkarin lei vek dawn tih loneitute a tiam. Vawiina Food Corporation of India Grievance Redressal System New Delhi-a a tlangzarhnaah he thu hi sawiin Pu Joshi chuan sawrkarin harsatna thlen theihna tur khawl neih chu sawrkarin a ngai pawimawh hle a ti a. Internet kaltlanga kalpui tur niin loneituten lungawilohna an thlen apiang chu lang tlang takin chinfel tum zel a ni ang a ti bawk.

<><><>